



Expediente IET: P-20-222
Proxecto: Parque eólico Vilartoxo
Concello: A Baña e Val do Dubra (A Coruña)
Promotor: Green Capital Power, S.L.

INFORME DE IMPACTO E INTEGRACIÓN PAISAXÍSTICA

De acordo co artigo 37.1 da Lei 21/2013, do 9 de decembro, de avaliación ambiental, e co artigo 11.3 da Lei 7/2008, do 7 de xullo, de protección da paisaxe de Galicia, con data do 03/05/2022 o Servizo de Enerxía e Minas da Coruña da Consellería de Economía, Empresa e Innovación, somete a informe do Instituto de Estudos do Territorio (IET) documentación relativa ao proxecto Parque eólico Vilartoxo.

1. Antecedentes:

Con data do 25/05/2020 o Instituto de Estudos do Territorio emitiu un informe sobre este proxecto, no marco do procedemento de avaliación de impacto ambiental ordinaria. Nese informe indicábase que o estudo de impacto ambiental (EIA), de acordo co artigo 11.1 da Lei 7/2008, do 7 de xullo, de protección da paisaxe de Galicia, tiña que incorporar un estudo de impacto e integración paisaxística (EIIP) debendo o seu contido axustarse ao disposto no artigo 11.2 da Lei 7/2008. Ademais facíanse unha serie de consideracións sobre os posibles efectos das infraestruturas na paisaxe e se indicaban distintos criterios e recomendacións encamiñados a minimizar os impactos e acadar unha adecuada integración paisaxística do proxecto.

Posteriormente, con data do 01/10/2021 o IET emitiu un informe de impacto e integración paisaxística, de acordo co previsto no artigo 11.3 da Lei 7/2008. Nese informe indicábase que o contido do EIIP tiña que se axustar ao disposto no artigo 11.2 da Lei 7/2008, no Regulamento da Lei 7/2008, e nas Directrices de paisaxe.

Na mesma data do 01/10/2021, o IET emitiu un informe sobre o proxecto de interese autonómico de acordo co previsto no artigo 7.2 da Lei 7/2008, e nos artigos 41 e 42 do RLPPG.

2. Marco legal:

Consonte co artigo 15 da Lei 1/2021, do 8 de xaneiro, de ordenación do territorio de Galicia, e co artigo 28 do Decreto 244/2011, do 29 de decembro (modificado polo Decreto 42/2019, do 28 de marzo), o Instituto de Estudos do Territorio (IET) é o órgano competente para emitir este informe en materia de paisaxe, de acordo co que para tal efecto establecen os artigos 32 e 33 do Regulamento para o desenvolvemento da Lei 7/2008, do 7 de xullo, de protección da paisaxe de Galicia, aprobado polo Decreto 96/2020, do 29 de maio (RLPPG).

En desenvolvemento da Lei 7/2008 aprobáronse o Catálogo das paisaxes de Galicia (Decreto 119/2016, do 28 de xullo) e as Directrices de paisaxe de Galicia (Decreto 238/2020, do 29 de decembro).

De acordo co artigo 11.1 da Lei 7/2008, todos os proxectos que deban someterse a declaración de impacto ambiental deberán incorporar no estudo de impacto ambiental un estudo de impacto e integración paisaxística (EIIP), como documento específico no que se avaliarán os efectos e impactos que o proxecto poida provocar na paisaxe e as medidas de



integración paisaxística propostas. O contido do EIIP debe axustarse ao disposto no artigo 11.2 da Lei 7/2008 e nos artigos 26 e seguintes do RLPPG.

3. Análise do EIIP, dos efectos do proxecto sobre a paisaxe e das medidas de integración paisaxística:

A documentación que se somete a informe consiste nun escrito con data do 31/03/2022, xunto cun documento de resposta (data do 30/03/2022) ao informe do IET do 01/10/2021.

O documento de resposta inclúe un apartado coa xustificación do cumprimento das Directrices de paisaxe, unha análise da afección visual do proxecto sobre os núcleos de poboación próximos e outros lugares de especial interese pola concentración de observadores, e unha proposta de localización de barreiras vexetais con especies autóctonas (carballos, bidueiros e loureiros) nos lugares máis expostos e a carón do centro de seccionamento para atenuar os impactos.

Non se produce ningún cambio no deseño das instalacións do parque, polo que os seus efectos sobre a paisaxe serán os que xa se valoraron nos anteriores informes.

En canto as medidas preventivas e correctoras previstas no EIIP e as achegadas nesta documentación adicional, poden considerarse, en xeral, adecuadas para reducir ou mitigar os impactos sobre a paisaxe.

4. Conclusión:

Á vista da documentación adicional presentada, pode considerarse cumprimentado o disposto no artigo 11.2 da Lei 7/2008 e nos artigos 26 e seguintes do RLPPG, dando resposta ademais ás consideracións efectuadas nos anteriores informes do IET. Non obstante, deberán integrarse no EIIP o novo apartado de xustificación da incorporación das Directrices de paisaxe e as medidas preventivas e correctoras.

O principal impacto paisaxístico deste proxecto será a incidencia visual dos aeroxeradores, que pola súa forma e altura serán visibles desde unha ampla extensión de terreos e a longas distancias; esta incidencia perdurará durante o tempo no que estean instalados os aeroxeradores, e se verá incrementada polo efecto sinérxico derivado da presenza doutros parques eólicos na contorna. Neste caso, entre as zonas afectadas pola incidencia visual caben destacar os núcleos máis próximos e o miradoiro de Santa Mariña. Esta incidencia visual, aínda que non pode ser mitigada con medidas correctoras agás nos núcleos rurais, non supón un impacto crítico.

En todo caso, de acordo co artigo 30.3 do RLPPG, as medidas de integración paisaxística deberán quedar oportunamente recollidas no proxecto.

José Luís Álvarez Vicente
Xefe do Servizo de Planificación da Paisaxe

José Antonio Serantes Barbeito
Director do Departamento Técnico de Estudos

Visto e conforme, Enrique Luís de Salvador Sánchez
Director do Instituto de Estudos do Territorio

(Na data da sinatura electrónica)

